

**MALAYSIA**  
**DEWAN RAKYAT**  
**ATURAN URUSAN MESYUARAT**

**NASKHAH SAHIH/BAHASA MALAYSIA**

<http://www.parlimen.gov.my>

**HARI KHAMIS, 20 MAC 2014, PUKUL 10.00 PAGI**

**Bil. 8**

---

**PERTANYAAN-PERTANYAAN BAGI JAWAB LISAN**

1. PR-1321-L59905  
**Datuk Ahmad Jazlan bin Yaakub [ Machang ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan adakah Kerajaan bercadang untuk menambah jumlah barangan terkawal dalam Skim Kawalan Harga untuk memastikan bahawa harga barangan keperluan asas yang lain tidak meningkat secara mendadak.
2. PR-1321-L60999  
**Tuan Shamsul Iskandar bin Mohd Akin [ Bukit Katil ]** minta **MENTERI LUAR NEGERI** menyatakan peranan Kementerian dalam memberi pandangan kepada pihak imigresen negara asing bagi menghalang seseorang individu atau tokoh politik memasuki negara tersebut, seperti mana Yang Berhormat Ketua Pembangkang dihalang daripada memasuki Jepun pada 19 Januari 2014 atas alasan "laporan terbaru" yang diterima.
3. PR-1321-L61266  
**Datuk Zahidi bin Zainul Abidin [ Padang Besar ]** minta **MENTERI KESIHATAN** menyatakan :-
  - (a) adakah Kementerian bercadang untuk menambah bilangan doktor/pegawai perubatan yang bertugas termasuk tambahan katil observasi supaya pesakit yang meminta rawatan di Unit Kecemasan Hospital dan Pusat Kesihatan diberikan rawatan secepat mungkin ; dan
  - (b) adakah Kementerian bercadang supaya rakyat berpendapatan rendah atau anak-anak rakyat berpendapatan rendah yang memerlukan pembedahan dan rawatan pakar diberikan bantuan pengecualian kos secara cepat dan tidak terhalang oleh prosedur birokrasi yang tidak munasabah.
4. PR-1321-L61240  
**Puan Hajah Zuraida binti Kamaruddin [ Ampang ]** minta **MENTERI SUMBER MANUSIA** menyatakan jumlah Orang Kurang Upaya (OKU) yang berada dalam pasaran buruh sepanjang tahun 2008 hingga 2011. Sejauh mana keberkesanan dasar sedia ada bagi menarik OKU menyertai pasaran buruh negara ini.

5. PR-1321-L60209  
**Dato' Hasbullah bin Osman [ Gerik ]** minta **MENTERI SUMBER ASLI DAN ALAM SEKITAR** menyatakan sejauh manakah keberkesanan pemindahan gajah-gajah liar dari seluruh kawasan di Utara Semenanjung ke Hutan Royal Belum dan Hutan Temengor:-
  - (a) kesan pada penempatan kampung Orang Asli dan Melayu di persekitarannya; dan
  - (b) langkah jangka panjang untuk atasi masalah tersebut, contohnya usaha penempatan baru kawasan gajah (*sanctuary gajah*) di situ selain di Kuala Gandah, Pahang.
6. PR-1321-L60470  
**Tuan Ignatius Dorell Leiking [ Penampang ]** minta **PERDANA MENTERI** menyatakan butiran mengenai jumlah projek pembangunan yang disalurkan kepada Sabah dan kesemua daerah-daerah di Sabah.
7. PR-1321-L59217  
**Dato' Haji Mohd Zaim bin Abu Hasan [ Parit ]** minta **PERDANA MENTERI** menyatakan apakah jaminan dan kedudukan keselamatan dan kedaulatan negara di atas perkembangan terkini krisis perebutan Wilayah di Laut China Selatan, khasnya tindakan Angkatan Tentera Laut negara China yang semakin agresif mencerobohi wilayah negara lain.
8. PR-1321-L59724  
**Tuan Mohamed Azmin bin Ali [ Gombak ]** minta **MENTERI KEWANGAN** menyatakan berapakah jumlah permohonan BR1M pada tahun 2013 mengikut kategori isi rumah dan berapakah permohonan yang diluluskan.
9. PR-1321-L60121  
**Tuan William @ Nyallau anak Badak [ Lubok Antu ]** minta **PERDANA MENTERI** menyatakan apakah kedudukan penyampaian perkhidmatan awam, setelah Malaysia melancarkan Projek Mega 1MOCC, berbanding negara-negara yang jauh lebih lewat membuat pelaburan dalam teknologi ICT.
10. PR-1321-L60156  
**Tuan Sim Tze Tzin [ Bayan Baru ]** minta **PERDANA MENTERI** menyatakan apakah alasan tidak menerapkan pemegang biasiswa JPA ke dalam perkhidmatan awam. Adakah mereka dikenakan apa-apa tindakan mengikut kontrak yang ditandatangani, jika gagal menyertai perkhidmatan awam. Berapa kes yang dikenakan tindakan ke atas pemegang biasiswa dari 2004 hingga 2013.
11. PR-1321-L61041  
**Datuk Haji Datu Nasrun bin Datu Mansur [ Silam ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan apakah perancangan Kementerian dalam membina rumah mampu milik untuk rakyat di Parlimen Silam. Memandangkan kawasan Parlimen Silam terlalu banyak rumah setinggan dan tidak tersusun yang menjejaskan taraf hidup rakyat. Adakah Kementerian akan mengutamakan dan memberi bantuan kepada rakyat yang masih tinggal di rumah setinggan ini untuk mendapatkan rumah mampu milik.

12. PR-1321-L60923  
**Tuan Haji Nasrudin bin Hassan [ Temerloh ]** minta **MENTERI PENDIDIKAN** menyatakan jumlah sebenar keperluan guru di peringkat sekolah mengikut subjek bagi tahun 2015.
13. PR-1321-L59516  
**Datuk Chua Tee Yong [ Labis ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan keberkesanan Akta Kawalan Harga dan Anti Pencatutan 2011 dalam mengatasi masalah pencatutan dalam masyarakat serta berapa banyak kes telah ditangkap dan didakwa dalam mahkamah malah apakah definisi pencatutan.
14. PR-1321-L60060  
**Tuan Zairil Khir Johari [ Bukit Bendera ]** minta **MENTERI KEMAJUAN LUAR BANDAR DAN WILAYAH** menyatakan menyenaraikan semua penempatan Orang Asli di Semenanjung Malaysia yang masih tidak mempunyai sekolah.
15. PR-1321-L59845  
**Datuk Joseph Salang anak Gandum [ Julau ]** minta **PERDANA MENTERI** menyatakan impak *1Malaysia Training Centre (1MTC)* kepada Kerajaan dan sejauh mana penggunaan 1MTC oleh agensi-agensi Kerajaan dan rakyat.
16. PR-1321-L60742  
**Dr. Michael Jeyakumar Devaraj [ Sungai Siput ]** minta **MENTERI TENAGA, TEKNOLOGI HIJAU DAN AIR** menyatakan pecahan jumlah kuasa elektrik (dalam Megawatt) yang dijanakan pada tahun 2013 di Malaysia daripada setiap sumber penjanaan iaitu arang batu, minyak, gas, kuasa hidro, solar, biogas, angin dan sebagainya. Apakah anggaran pelepasan karbon dioksida untuk menjanakan 1 megawatt kuasa elektrik daripada tiap sumber penjanaan ini.
17. PR-1321-L60012  
**Dato' Sri Liow Tiong Lai [ Bentong ]** minta **MENTERI KEWANGAN** menyatakan langkah-langkah yang diambil oleh Kerajaan bagi memastikan bahawa Program Rasionalisasi Subsidi oleh Kerajaan tidak akan membebankan rakyat.
18. PR-1321-L59873  
**Dr. Ong Kian Ming [ Serdang ]** minta **MENTERI PENDIDIKAN** menyatakan status terkini SRJK (C) Kajang 2 yang telah dijanjikan oleh Kerajaan sejak tahun 2008 dan juga status terkini SRJK (C) Bandar Sungai Long.
19. PR-1321-L60896  
**Datuk Ir. Dr. Wee Ka Siong [ Ayer Hitam ]** minta **MENTERI PENDIDIKAN** menyatakan sejauh manakah transformasi pengajian tinggi dilakukan dan bagaimana ranking universiti dapat diperbaiki. Apakah rasional pengambilan peringkat ijazah pertama dikurangkan bagi semua universiti penyelidikan dan ranking di peringkat antarabangsa kian menjunam.

20. PR-1321-L60655  
**Dr. Haji Izani bin Haji Husin [ Pengkalan Chepa ]** minta **MENTERI KESIHATAN** menyatakan bilakah cadangan untuk membina Klinik Kesihatan Penambang, Kota Bharu yang telah dijanjikan oleh pihak Kerajaan sejak Rancangan Malaysia Kesembilan, Kos projek dianggarkan RM3,503,535.85.
21. PR-1321-L60802  
**Dr. Mansor bin Abd Rahman [ Sik ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan berapakah jumlah dan keluasan projek perumahan rakyat yang telah diwartakan untuk dibangunkan di seluruh negara dan setakat manakah perkembangan projek pembangunan ini sama ada yang berstatus sedang dimajukan atau dalam perancangan.
22. PR-1321-L59677  
**Dato' Ir. Haji Nawawi bin Ahmad [ Langkawi ]** minta **MENTERI PERTANIAN DAN INDUSTRI ASAS TANI** menyatakan apakah jenis-jenis bantuan yang telah diberikan oleh Kementerian bagi membantu meringankan bebanan kehidupan para nelayan.
23. PR-1321-L59931  
**Tuan Gooi Hsiao-Leung [ Alor Setar ]** minta **MENTERI DALAM NEGERI** menyatakan hasil siasatan polis mengenai dua laporan polis (Jitra/009674/13 dan Jitra/009236/13) yang dibuat mengenai kecederaan yang dialami Zul Hilmi Bin Abdul Rahman semasa dalam tahanan polis daripada 11 Disember 2013 sehingga 22 Disember 2013.
24. PR-1321-L59943  
**Dato' Seri Reezal Merican bin Naina Merican [ Kepala Batas ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan adakah pihak Kementerian bercadang untuk memperkenalkan konsep kad 'flybuys' seperti yang diamalkan di Australia untuk meringankan beban rakyat.
25. PR-1321-L60140  
**Tuan Teo Kok Seong [ Rasah ]** minta **MENTERI KEMAJUAN LUAR BANDAR DAN WILAYAH** menyatakan secara terperinci langkah yang diambil oleh pihak Kerajaan untuk membantu penduduk luar bandar yang miskin dan berpendapatan rendah untuk membaik pulih tempat kediaman mereka yang uzur serta kos yang terlibat sejak tahun 2000 sehingga tahun 2014.
26. PR-1321-L59506  
**Datuk Wira Haji Ahmad bin Hamzah [ Jasin ]** minta **MENTERI KESEJAHTERAAN BANDAR, PERUMAHAN DAN KERAJAAN TEMPATAN** menyatakan langkah menangani penjejakan bahan buangan sampah yang semakin kritikal hari ini terutamanya di bandar-bandar besar.
27. PR-1321-L60620  
**Tuan Julian Tan Kok Ping [ Stampin ]** minta **MENTERI SAINS, TEKNOLOGI DAN INOVASI** menyatakan jumlah peruntukan penyelidikan dari tahun 2008 sehingga sekarang. Senaraikan pengagihan peruntukan ini kepada IPTS dan IPTA.

28. PR-1321-L59769  
**Tuan Anuar bin Abd. Manap [ Sekijang ]** minta **MENTERI PERTANIAN DAN INDUSTRI ASAS TANI** menyatakan Pusat Pembangunan Perniagaan Pertanian dan Makanan (Agri-BDC) ialah pusat sumber dan maklumat setempat yang diwujudkan oleh Kerajaan bagi menyokong dan membangunkan perniagaan dalam bidang pertanian dan makanan negara:-
- (a) berapakah jumlah program yang dijalankan sejak 2010-2013 untuk membantu usahawan tani muda; dan
  - (b) apakah bentuk bantuan kewangan yang disediakan untuk usahawan tani muda ini.
29. PR-1321-L60440  
**Tuan Loke Siew Fook [ Seremban ]** minta **PERDANA MENTERI** menyatakan jumlah kos bahan api dan penyelenggaraan untuk pesawat-pesawat eksekutif Kerajaan bagi tahun 2013 dan jumlah penerbangan yang terlibat pada tempoh tersebut.
30. PR-1321-L59338  
**Datuk Koh Nai Kwong [ Alor Gajah ]** minta **PERDANA MENTERI** menyatakan apakah status dan perkembangan Program Transformasi Ekonomi atau ETP dalam mewujudkan pekerjaan bergaji tinggi serta menaikkan pendapatan rakyat dan negara.
31. PR-1321-L59228  
**Dato' Kamarul Baharin bin Abbas [ Telok Kemang ]** minta **MENTERI PERDAGANGAN DALAM NEGERI, KOPERASI DAN KEPENGUNAAN** menyatakan:-
- (a) setakat mana Akta '*Price Control and Anti-Profiteering Act 2011*' (PCAPA) dapat mengawal kenaikan harga pencatutan (*profiteering*); dan
  - (b) berapa banyak kes dan dakwaan yang telah berjaya dibuat di bawah akta tersebut.
32. PR-1321-L59715  
**Dato' Ar. Wan Mohammad Khair-il Anuar bin Wan Ahmad [ Kuala Kangsar ]** minta **MENTERI PELANCONGAN DAN KEBUDAYAAN** menyatakan jemaah Umrah sering kali ditipu oleh pihak agensi berdaftar mahupun yang tidak berdaftar dengan Kementerian. Apakah langkah-langkah Kerajaan untuk mengatasi perkara ini supaya ianya tidak berleluasa khususnya dengan tawaran-tawaran harga murah dan sederhana di kalangan jemaah dari luar bandar.
33. PR-1321-L59186  
**Dato' Dr. Mujahid Yusof Rawa [ Parit Buntar ]** minta **MENTERI PELANCONGAN DAN KEBUDAYAAN** menyatakan usaha pelancongan Islam dalam mempromosi budaya dan sejarah Islam di negara ini.

34. PR-1321-L60813  
**Tuan Tony Pua Kiam Wee [ Petaling Jaya Utara ]** minta **PERDANA MENTERI** menyatakan secara terperinci syarat-syarat penswastaan Pelabuhan Pulau Pinang termasuk pemilik syarikat baru, tarikh perjanjian, nilai dan struktur penswastaan dan lain-lain syarat utama. Adakah pihak swasta diwajibkan untuk mendalamkan Selat Pulau Pinang untuk membolehkan kapal yang lebih besar singgah di sana.
35. PR-1321-L60126  
**Tuan Masir Kujat [ Sri Aman ]** minta **MENTERI KOMUNIKASI DAN MULTIMEDIA** menyatakan apakah usaha Kerajaan dalam memastikan jurang digital (*digital gap*) di antara rakyat di bandar dan luar bandar agar semua inisiatif ICT yang diperkenalkan dapat dimanfaatkan hingga ke akar umbi.
36. PR-1321-L59242  
**Dato' Takiyuddin bin Hassan [ Kota Bharu ]** minta **MENTERI PELANCONGAN DAN KEBUDAYAAN** menyatakan apakah program khas yang dirancang untuk diadakan di negeri Kelantan bersempena dengan Tahun Melawat Malaysia 2014.
37. PR-1321-L61129  
**Tuan Che Mohamad Zulkifly bin Jusoh [ Setiu ]** minta **MENTERI KESIHATAN** menyatakan langkah Kementerian bagi meningkatkan kesihatan mental di kalangan rakyat negara ini dan apakah langkah Kementerian bagi menangani kesihatan mental di kalangan rakyat negara ini dalam agenda kesihatan nasional.
38. PR-1321-L61231  
**Dato' Seri Tiong King Sing [ Bintulu ]** minta **PERDANA MENTERI** menyatakan:-
- (a) apakah sebab Pejabat Pengarah Tanah dan Galian (PTG) Wilayah Persekutuan perlu mengambil masa lebih daripada 6 bulan untuk mendaftarkan pindah milik jenis strata; dan
  - (b) apakah langkah-langkah drastik yang akan diambil PTG Wilayah Persekutuan untuk mengatasi kesulitan ini.
39. PR-1321-L61100  
**Dr. Azman bin Ismail [ Kuala Kedah ]** minta **PERDANA MENTERI** menyatakan faktor-faktor yang dianggap paling kritikal dalam mencapai status negara maju di tahun 2020. Apakah kesukaran terbesar dalam mencapai status negara maju tersebut.
40. PR-1321-L59203  
**Tuan Idris bin Haji Ahmad [ Bukit Gantang ]** minta **MENTERI PERTANIAN DAN INDUSTRI ASAS TANI** menyatakan berapakah bilangan peminjam dan nilai peminjam TEKUN di Parlimen Bukit Gantang yang belum menjelaskan hutang TEKUN sehingga Disember 2013.

41. PR-1321-L60063  
**Tuan Karpal Singh [ Bukit Gelugor ]** minta **MENTERI DALAM NEGERI** menyatakan kepada Dewan berapakah jumlah bilangan pengawal keselamatan yang sah berdaftar di negara ini dan kriteria yang diterima pakai bagi pelantikan pengawal keselamatan.
42. PR-1321-L59961  
**Dato' Othman bin Aziz [ Jerlun ]** minta **MENTERI SUMBER MANUSIA** menyatakan sama ada pihak Kementerian bercadang untuk menjalinkan kerjasama dengan Kementerian Pendidikan bagi mengatasi masalah graduan yang sukar mendapat penempatan pekerjaan ekoran pemilihan pengkhususan bidang di universiti yang tidak selari dengan penawaran pekerjaan pada masa kini.
43. PR-1321-L59655  
**Tuan Haji Hasbi bin Haji Habibollah [ Limbang ]** minta **MENTERI KEMAJUAN LUAR BANDAR DAN WILAYAH** menyatakan bilakah Kementerian akan menyambung pelaksanaan pembinaan Jalan Meritam-Telahak-Buangabai-Pengkalan Rejab-Sungai Poyan Fasa 2 yang terbengkalai sehingga membantutkan pembinaan untuk Fasa 3.
44. PR-1321-L61027  
**Tuan Wong Ling Bui [ Sarikei ]** minta **MENTERI PERTANIAN DAN INDUSTRI ASAS TANI** menyatakan apakah jenis-jenis subsidi yang masih diberikan kepada petani-petani pada masa sekarang untuk membantu petani-petani meningkatkan taraf hidup mereka di kawasan Parlimen Sarikei khasnya di daerah Sarikei dan Meradong.
45. PR-1321-L61065  
**Dato' Ahmad Fauzi bin Zahari [ Setiawangsa ]** minta **PERDANA MENTERI** menyatakan status terkini The Eastern Sabah Security Command (ESSCOM) dan jumlah kekuatan yang dimiliki ESSCOM setakat ini. Adakah terdapat sebarang kemungkinan ancaman lain yang telah dapat dikesan oleh ESSCOM.
46. PR-1321-L59798  
**Tuan Ahmad Baihaki bin Atiqullah [ Kubang Kerian ]** minta **MENTERI PENDIDIKAN** menyatakan banyak klip video yang memaparkan kejadian buli yang berlaku di kalangan pelajar sekolah telah dimuat naikan ke alam maya. Apakah pihak Kementerian boleh menjadikan ianya sebagai asas untuk diambil tindakan dan bagaimana kejadian-kejadian itu diselesaikan.
47. PR-1321-L59994  
**Datuk Sapawi bin Ahmad Wasali [ Sipitang ]** minta **MENTERI PERDAGANGAN ANTARABANGSA DAN INDUSTRI** menyatakan bagaimana harapan Malaysia berhubung rundingan Perjanjian Perkongsian Trans-Pasifik (TPPA) dan bila ia dijangka dapat dimuktamadkan dan sejauh mana jaminan terhadap kepentingan Bumiputera serta Perusahaan Kecil dan Sederhana (PKS).

48. PR-1321-L60079  
**Tuan Nga Kor Ming [ Taiping ]** minta **MENTERI PELANCONGAN DAN KEBUDAYAAN** menyatakan berapakah jumlah kos untuk menganjurkan Majlis Rumah Terbuka Tahun Baru Cina di Taiping, Majlis Rumah Terbuka Deepavali, Majlis Rumah Terbuka Hari Raya serta Majlis Rumah Terbuka Krismas sempena Tahun Melawat Malaysia 2014 dan pencapaian program sedemikian.
49. PR-1321-L60787  
**Tuan Chua Tian Chang @ Tian Chua [ Batu ]** minta **PERDANA MENTERI** menyatakan apakah hasil siasatan SPRM terhadap dakwaan harta kekayaan Ketua Menteri Sarawak, Tan Sri Abdul Taib Mahmud yang dikumpul melalui rasuah dan penyelewengan. Adakah kes-kes ini telah digugurkan.
50. PR-1321-L59461  
**Tuan Sim Tong Him [ Kota Melaka ]** minta **PERDANA MENTERI** menyatakan:-
- (a) usaha Kerajaan untuk mencegah dan mengawal kemerosotan perhubungan dan perpaduan di antara kaum dan di antara penganut-penganut berbilang agama; dan
  - (b) apakah tindakan-tindakan yang sedang dan akan diambil untuk mencapai matlamat ini.
51. PR-1321-L60092  
**Tuan Er Teck Hwa [ Bakri ]** minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan jumlah kes penyelewengan diesel bersubsidi dilaporkan, jumlah tangkapan, jumlah pendakwaan, dihukum dan dibebaskan serta diberikan amaran sahaja mengikut negeri dan daerah dari 2008 sehingga 2013 serta kawasan yang tertinggi dan terendah berlakunya penyelewengan diesel bersubsidi.
52. PR-1321-L61119  
**Dato' Fauzi bin Abdul Rahman [ Indera Mahkota ]** minta **MENTERI KERJA RAYA** menyatakan apakah status atau kemajuan jalan yang telah dirancang pembinaannya dari Sungai Lembing, Kuantan ke Jerantut. Berapakah peruntukan sebenar yang telah diluluskan, dan adakah kerja-kerja menetapkan laluan (*alignment*) sudah disiapkan.
53. PR-1321-L60258  
**Tuan Jeff Ooi Chuan Aun [ Jelutong ]** minta **MENTERI KOMUNIKASI DAN MULTIMEDIA** menyatakan apakah tindakan dan penalti yang telah diambil ke atas Telekom Malaysia dan TIME Telekom yang memaksa para pemaju untuk memberi sumbangan kewangan tertentu sebelum rangkaian telekomunikasi talian tetap dipasang di kawasan-kawasan pembangunan. Bukankah perlakuan ini bercanggah dengan ketetapan SKMM bertarikh 22 Jun 2009.
54. PR-1321-L59980  
**Tuan Charles Anthony Santiago [ Klang ]** minta **MENTERI DALAM NEGERI** menyatakan dasar Kerajaan untuk mengawal selia firma-firma penyumberan luar (*outsourcing*) dan adakah bilangan pekerja (tempatan dan asing) yang telah diberikan pekerjaan melalui firma-firma ini.



55. PR-1321-L60264  
**Dr. Tan Seng Giaw [ Kepong ]** minta **MENTERI KOMUNIKASI DAN MULTIMEDIA** menyatakan pembangunan dunia maya Internet di semua aspek di negara ini berbanding dengan Korea Selatan. Apakah jenis, jumlah kos dan prestasinya.
56. PR-1321-L59639  
**Puan Teresa Kok Suh Sim [ Seputeh ]** minta **MENTERI KEWANGAN** menyatakan sama ada Kerajaan akan menambat (*peg*) Ringgit Malaysia (RM) dengan mata wang negara asing untuk mencegah nilai RM daripada jatuh. Nyatakan kejatuhan nilai RM pada tahap apakah yang Kerajaan akan menambat dengan mata wang asing.
57. PR-1321-L59604  
**Dato' Seri Ong Ka Chuan [ Tanjong Malim ]** minta **MENTERI KEWANGAN** menyatakan apakah tindakan yang akan diambil oleh Kerajaan untuk memastikan subsidi yang lain yang menjimatkan dapat digunakan di tempat yang sesuai dan golongan sasaran yang tepat untuk mendapat manfaat yang paling maksima kepada rakyat dan negara.
58. PR-1321-L60573  
**Tuan Sim Chee Keong [ Bukit Mertajam ]** minta **MENTERI DALAM NEGERI** menyatakan pecahan bilangan pegawai polis mengikut bahagian Logistik, JSJ, Cawangan Khas, KDNKA, Narkotik dan Pengurusan di setiap negeri mengikut tahun dari 2008 sehingga kini.
59. PR-1321-L60409  
**Puan Alice Lau Kiong Yieng [ Lanang ]** minta **MENTERI KEWANGAN** menyatakan:-
- (a) sama ada rakyat yang sedang menerima bantuan Jabatan Kebajikan Masyarakat (JKM) juga layak memohon Bantuan Rakyat 1Malaysia (BR1M); dan
  - (b) sama ada semua penerima bantuan JKM akan diberi insurans takaful yang ditawarkan dalam BR1M secara automatik dan bilangan penerima bantuan JKM yang berjaya memohon BR1M.
60. PR-1321-L60162  
**Tuan Ng Wei Aik [ Tanjong ]** minta **PERDANA MENTERI** menyatakan perkembangan terkini dan sebab-sebab penswastaan Penang Port Sdn. Bhd. (PPSB) tidak dapat disempurnakan sehingga hari ini. Bilakah projek pengorekan dasar laut akan dilaksanakan oleh Kerajaan Persekutuan atau PSPB.
61. PR-1321-L60954  
**Tuan Wong Sze Phin @ Jimmy [ Kota Kinabalu ]** minta **MENTERI PERTANIAN DAN INDUSTRI ASAS TANI** menyatakan mengapa terdapat perbezaan subsidi beras antara Sabah (RM600) dan Semenanjung Malaysia (RM750). Adakah subsidi beras tersebut bertujuan untuk membantu petani, pemborong atau pengilang beras.

62. PR-1321-L60482  
**Dato' Johari bin Abdul [ Sungai Petani ]** minta **MENTERI DALAM NEGERI** menyatakan:-
- (a) memandangkan media melaporkan terdapat hampir 1,500 orang Mat Rempit mengadakan perhimpunan dan perlumbaan haram di Batu Feringghi Pulau Pinang pada Januari 2014 yang lalu. Adakah aktiviti ini dalam pengetahuan PDRM, jika ya adakah aktiviti ini dibenarkan di sisi undang-undang; dan
  - (b) adakah Kerajaan berhasrat menggunakan khidmat Cawangan Khas PDRM bagi mengenal pasti ketua-ketua pasukan mat rempit ini dan mengambil tindakan awal menahan dan membuat siasatan atas kegiatan mereka.
63. PR-1321-L59325  
**Dr. Noor Azmi bin Ghazali [ Bagan Serai ]** minta **MENTERI SAINS, TEKNOLOGI DAN INOVASI** menyatakan apakah usaha serius Kementerian untuk mengkomersialkan penggunaan teknologi sensor dan teknologi nano dalam pelbagai bidang seperti keselamatan, alam sekitar, makanan, pertanian dan perubatan demi memberi manfaat kepada industri tersebut dalam negara dan juga rakyat.
64. PR-1321-L60770  
**Tuan Lim Kit Siang [ Gelang Patah ]** minta **MENTERI KOMUNIKASI DAN MULTIMEDIA** menyatakan sama ada pencapaian paling teruk Malaysia di Indeks Kebebasan Media Sedunia 2014-2017, kita berada di tempat ke-147 daripada 180 negara yang dikaji, lebih rendah kedudukannya daripada Myanmar adalah selaras dengan dakwaan beliau bahawa Malaysia adalah satu demokrasi terbaik di dunia dan apakah respons Kerajaan terhadap pencapaian berkenaan.
65. PR-1321-L59451  
**Tuan Seah Leong Peng [ Telok Intan ]** minta **MENTERI DALAM NEGERI** menyatakan :-
- (a) selepas 6P, berapakah jumlah pekerja asing yang telah didaftarkan dan berapakah anggaran pekerja asing yang masih tidak berdaftar lagi; dan
  - (b) mengapa terdapat lambakan pekerja asing dari Negara China bekerja dalam bidang perkhidmatan refleksologi sedangkan pekerja dari Negara China dan sektor refleksologi tidak tersenarai dalam negara sumber dan sektor yang dibenarkan.
66. PR-1321-L60548  
**Tuan V. Sivakumar [ Batu Gajah ]** minta **MENTERI BELIA DAN SUKAN** menyatakan apakah langkah-langkah yang akan diambil oleh pihak Kementerian bagi mengenal pasti bakat-bakat baru dalam sukan mempertahankan diri karate-do, tekwando, silat, silambam, wusyu dan sebagainya. Berapakah jumlah yang diperuntukkan bagi tujuan tersebut.

67. PR-1321-L60425  
**Tuan Ahmad Marzuk bin Shaary [ Bachok ]** minta **MENTERI PENDIDIKAN** menyatakan sejauh manakah gerakan penentangan oleh guru-guru terhadap Pentaksiran Berasaskan Sekolah (PBS). Adakah perbincangan telah dibuat dengan kumpulan penentang ini dan apakah hasilnya.
68. PR-1321-L59743  
**Datuk Wee Jeck Seng [ Tanjong Piai ]** minta **MENTERI DALAM NEGERI** menyatakan bagaimanakah proses pengendalian permohonan pas lawatan kepada pemilik kad pengenalan merah boleh dipermudahkan khasnya kepada tujuan pembaharuan (*renewal*) tanpa melalui proses ulangan seperti seolah-olah satu permohonan baru yang menyulitkan pemohon kategori ini.
69. PR-1321-L60214  
**Dato' Kamarudin bin Jaffar [ Tumpat ]** minta **MENTERI LUAR NEGERI** menyatakan kenapa tugas Kedutaan Malaysia untuk Palestin ditanggung oleh kedutaan kita di Mesir dan tidak melalui kedutaan khusus di bumi Palestin.
70. PR-1321-L60836  
**Tuan Chong Chieng Jen [ Bandar Kuching ]** minta **MENTERI KEWANGAN** menyatakan apakah syarat-syarat terperinci mengenai pinjaman *off-shore* sejumlah US\$1.6 bilion yang dipinjam oleh Kerajaan Negeri Sarawak melalui syarikat-syarikat subsidiarinya yang pinjaman itu diuruskan melalui bank-bank *off-shore* Labuan dalam tahun 2011 dan 2012. Apakah pengurusan dan penggunaan wang pinjaman itu diselia oleh Audit Negara.
71. PR-1321-L60037  
**Tuan Gobind Singh Deo [ Puchong ]** minta **MENTERI KERJA RAYA** menyatakan apakah langkah-langkah yang akan diambil oleh Kerajaan Pusat untuk memastikan dana yang dikeluarkan oleh Kerajaan untuk membaik pulih jalan-jalan Persekutuan dalam kawasan Parlimen Puchong diguna pakai dengan cepat dan efektif.
72. PR-1321-L60602  
**Tuan Liew Chin Tong [ Kluang ]** minta **MENTERI DALAM NEGERI** menyatakan jumlah kes pemintasan e-mel, telekomunikasi dan pos dalam pecahan ahli politik, suspek jenayah dan orang awam oleh pihak kuasa di bawah peruntukan undang-undang pada tahun 1998 hingga 2014.
73. PR-1321-L60984  
**Puan Kasthuriraani a/p Patto [ Batu Kawan ]** minta **PERDANA MENTERI** menyatakan jumlah peruntukan bagi Suruhanjaya Pencegahan Rasuah Malaysia tahun 2000 hingga 2014 serta justifikasi peningkatan dalam peruntukan belanjawan SPRM walhal kes rasuah masih meningkat.
74. PR-1321-L59449  
**Datuk Noor Ehsanuddin bin Mohd Harun Narrashid [ Kota Tinggi ]** minta **MENTERI PELANCONGAN DAN KEBUDAYAAN** menyatakan sama ada Kementerian bercadang untuk mewujudkan satu program khas untuk menarik minat para pelancong melawat tempat-tempat menarik di Parlimen Kota Tinggi sempena Tahun Melawat Malaysia 2014.

75. PR-1321-L60837  
**Datuk Rozman bin Isli [ Labuan ]** minta **MENTERI PENDIDIKAN** menyatakan berdasarkan status Kolej Vokasional Labuan yang pada masa ini sedang menghadapi kekurangan asrama sementara pelajar, adakah rancangan untuk membaiki dua (2) blok asrama sedia ada untuk boleh dihuni kembali dalam tahun ini.
76. PR-1321-L60981  
**Dato' Abd. Aziz bin Haji Sheikh Fadzir [ Kulim Bandar Baharu ]** minta **MENTERI PELANCONGAN DAN KEBUDAYAAN** menyatakan Program *Volunteer Tourism* merupakan satu program pelancongan yang dapat mendekati kehidupan rakyat sesuatu kawasan. Apakah Kementerian bercadang untuk memperkembangkan program ini di peringkat lebih tinggi dan apakah langkah-langkah yang dapat diambil bagi menarik pelancong luar datang ke Malaysia terutamanya di kawasan luar bandar.
77. PR-1321-L61286  
**Datuk Ikmal Hisham bin Abdul Aziz [ Tanah Merah ]** minta **MENTERI KOMUNIKASI DAN MULTIMEDIA** menyatakan sejak Januari hingga Februari 2014 berapa banyak laman blog mahupun media sosial yang diambil tindakan kerana menyiarkan perkara-perkara sensitif yang dilihat boleh menyebabkan ketegangan kaum dan agama.

### **ATURAN URUSAN MESYUARAT DAN USUL-USUL**

1. **Usul dibuat oleh Yang Berhormat Tan Sri Datuk Seri Utama Shahrir bin Abdul Samad (Johor Bahru)** dan masalah dicadangkan :-

“Bahawa suatu ucapan yang tidak sepertinya dipersembahkan kepada Seri Paduka Baginda Yang di-Pertuan Agong, demikian bunyinya:-

“ Ampun Tuanku,

Patik, Yang di-Pertua dan Ahli-ahli Dewan Rakyat Malaysia di dalam Persidangan Parlimen, memohon ampun mempersembahkan suatu ucapan yang ikhlas daripada Majlis Dewan Rakyat mengucapkan berbanyak-banyak syukur dan menjunjung kasih kerana Titah Ucapan Seri Paduka Baginda semasa membuka Penggal Kedua, Parlimen Yang Ketiga Belas.”

#### **Menyambung semula Perbahasan atas masalah (19 Mac, 2014)**

2. (D.R. 23/2013) Rang Undang-undang Saraan Hakim **Bacaan Kali**  
(Pindaan) 2013 **Yang Kedua**

#### **[ Menteri di Jabatan Perdana Menteri ]**

3. (D.R. 13/2013) Rang Undang-undang Bahan-bahan “  
Kakisan dan Letupan dan Senjata  
Berbahaya (Pindaan) 2013

#### **[ Menteri Dalam Negeri ]**

4. (D.R. 24/2013) Rang Undang-Undang Pencegahan “  
Pengubahan Wang Haram dan  
Pencegahan Pembiayaan Keganasan  
(Pindaan) 2013

#### **[ Menteri Kewangan ]**

5. **Menteri Kewangan akan mencadangkan:-**

“Bahawa Dewan ini, mengikut peruntukan di bawah Seksyen 5 Akta Persatuan Pembangunan Antarabangsa 1960, mengambil ketetapan supaya Malaysia membuat sumbangan kepada Program Penambahan Dana Ke 17 Persatuan Pembangunan Antarabangsa sebanyak USD27,000,000.00 (dua puluh juta sahaja)”.

6. PR-1321-U59393

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, rakyat padakeseluruhannya berbesar hati dan mengalu-alukan usaha kerajaan dalam menangani masalah jenayah di negara ini dengan menubuhkan satu jabatan khusus dalam institutusi kepolisan iaitu Jabatan Pencegahan dan Pembanterasan Jenayah Polis DiRaja Malaysia.

Dan mengambil maklum juga, bahawa umum mengetahui bahawa Jabatan Pencegahan dan Pembanterasan Jenayah PDRM ini hanya berfungsi diperingkat Ibupejabat Bukit Aman sahaja dan keanggotaanya amat terhad.

Dan mengambil maklum juga bahawa, kekangan yang dihadapi oleh JPPJ dan PDRM ini adalah disebabkan oleh kelewatan pihak Suruhanjaya Perkhidmatan Awam dalam memproses keperluan bagi perjawatan dan mengisi perjawatan dalam JPPJ-PDRM.

Dan mengambil maklum juga bahawa, rakyat dan masyarakat menaruh harapan serta kepercayaan penuh bahawa dengan tertubuhnya JPPJ-PDRM ini, kadar jenayah dinegara ini akan dapat diturunkan pada kadar minima dan sekali gus menjadikan keboleh-percayaan rakyat mengenai dengan keselamatan negara ditingkatkan.

Maka, bagi menangani masalah yang dihadapi oleh JPPJ-PDRM ini, Dewan ini hendaklah mengambil ketetapan bahawa, pihak kerajaan hendaklah dalam kadar segera mendesak pihak Suruhanjaya Perkhidmatan Awam Malaysia untuk segera menyediakan perjawatan bagi semua jawatan yang diperlukan dalam Jabatan Pencegahan dan Pembenterasan Jenayah Polis DiRaja Malaysia, supaya jabatan ini dapat ditubuhkan disemua peringkat, iaitu peringkat Pusat Bukit Aman, peringkat Ibupejabat Polis Kontigen dan Ibu Pejabat Polis Daerah, agar fungsinya sebagai Agensi Pencegahan dan Pembanterasan Jenayah dapat dilaksanakan dengan jayanya."

**( Perdana Menteri )**

7. PR-1321-U59394

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, sejak tertubuhnya Kawasan Keselamatan Khas Pantai Timur Sabah - ESSCOM, aliran keluar masuk pendatang asing kenegara ini, kini boleh dipantau sebanyak-sedikit.

Dan mengambil maklum juga, bahawa kawasan ESSCOM ini masih belum kebal-tembus oleh penceroboh asing yang selalu mengganggu-gugat keselamatan dan kedaulatan negara. Dan mengambil maklum juga bahawa, dengan aset sedia ada, kerja-kerjapengawasan dan perlindungan kawasan ESSCOM yang panjangnya sejauh 1400 kilometer amatlah rumit.

Dan juga mengambil maklum bahawa, pengendalian dan kos operasi aset-aset ESSCOM sedia ada amatlah tinggi dan bagi sesetengah situasi, agak merbahaya bagi anggota yang terlibat. Maka, bagi menangani masalah pengawasan dan perlindungan kawasan ESSCOM ini, dewan ini hendaklah mengambil ketetapan bahawa, selain dengan aset sedia ada, kerajaan hendaklah menggunakan khidmat kenderaan udara tanpa pemandu drone - unmanned aerial vehicle) terutama sekali bagi menjalankan kerja-kerja pengawasan perairan ESSCOM."

**( Perdana Menteri )**

8. PR-1321-U59409

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, kedai rakyat 1Malaysia - KR1M menawarkan harga barangan 30% - 40% lebih murah berbanding dengan kedai biasa. Dan mengambil maklum juga, bahawa hasrat murni kerajaan untuk mengurangkan bebanan kos sara hidup rakyat ini amatlah disanjung tinggi dan seharusnya dinikmati oleh semua lapisan rakyat terutamanya mereka yang berpendapatan rendah jauh dipedalaman.

Dan mengambil maklum juga bahawa, hampir semua KR1M terletak dipekan-pekan utama terutama sekali dinegeri Sabah. Kedudukan ini serba-sedikit membantutkan usaha kerajaan untuk mengurangkan beban kos sara hidup kumpulan sasar - kumpulan berpendapatan rendah, dari segi kebolehcapaian pengguna. Misalnya, adalah tidak praktikal bagi pengguna untuk ke pekan hanya untuk membeli sekilo tepung.

Dan mengambil maklum juga bahawa, hasrat kerajaan dalam menubuhkan KR1M ini boleh dipanjangkan lagi dengan konsep merakyatkan KR1M. Yakni pihak KR1M bolehlah menyediakan perkhidmatan jurujual dengan menggunakan van atau pun lori, di mana jurujual ini akan masuk ke seluruh kedai-kedai runcit yang terdapat di kampung-kampung, mukim dan sebagainya bagi membekalkan produk KR1M.

Dengan kaedah ini, produk KR1M dapat di boleh-capai oleh semua lapisan rakyat Malaysia. Maka, bagi memenuhi hasrat kerajaan dalam penubuhan KR1M, dewan ini hendaklah mengambil ketetapan bahawa, pihak kerajaan hendaklah memperluaskan lagi kebolehcapaian KR1M dengan memperluaskan pasaran produk KR1M melalui kaedah diatas."

**( Menteri Perdagangan Dalam Negeri, Koperasi Dan Kepenggunaan )**

9. PR-1321-U59411

**Datuk Dr. Makin @ Marcus Mojigoh [ Putatan ]** akan mencadangkan:-

"Bahawa Dewan ini mengambil maklum bahawa, Sekolah Rendah Jenis Kebangsaan Hwa Shiong Putatan terletak berhampiran dengan Lebuh raya Putatan - Papar.

Dan mengambil maklum juga, bahawa sekolah ini menempatkan lebihdaripada 700 orang murid sekolah dimana lebih daripada 50% murid iniakan menyeberang Lebuhraya Putatan - Papar, bagi tujuan menaiki bas,kereta atau pun berjalan kaki untuk pergi dan pulang ke sekolah.

Dan mengambil maklum juga bahawa, lintasan ini juga digunakan olehorang ramai.

Dan mengambil maklum juga bahawa, selain Lebuhraya Putatan - Papar, murid-murid SRJKC Hwa Shiong dan orang ramai juga kena menlintasilaluan kereta api bagi tujuan urusan harian mereka. Maka, atas faktor keselamatan, Dewan ini hendaklah mengambil ketetapan bahawa, pihak Kerajaan hendaklah mendirikan jejantas pejalan kaki, menyeberangi rel kereta api dan Lebuhraya Putatan – Papar Berhadapan dengan SRJKC Hwa Shiong demi untuk keselamatan murid-murid sekolah dan orang awam."

**( Menteri Kerja Raya )**

10. PR-1321-U60274

**Dr. Tan Seng Giaw [ Kepong ]** akan mencadangkan:-

"Bahawa Dewan ini membahaskan langkah-langkah yang boleh memperkukuhkan keamanan dan perpaduan negara majmuk ini".

**( Perdana Menteri )**

11. PR-1321-U60276

**Dr. Tan Seng Giaw [ Kepong ]** akan mencadangkan:-

"Bahawa Dewan ini membincangkan projek memperbaiki Dewan yang bocor, tempoh yang diperlukan dan jumlah perbelanjaan, sebagai contoh teladan kepada negara".

**( Perdana Menteri )**

12. PR-1321-U60277

**Dr. Tan Seng Giaw [ Kepong ]** akan mencadangkan:-

"Bahawa Dewan ini menyatakan kadar pembangunan Internet yang terkini di semua aspek berbanding dengan negara seperti Korea Selatan. Apakah jenis pembangunan dan jumlah kosnya serta prestasinya."

**( Menteri Komunikasi dan Multimedia )**



13. PR-1321-U59580

**Tuan Fong Kui Lun [ Bukit Bintang ]** akan mencadangkan:-

"Bahawa Dewan ini menggesa Suruhanjaya Pilihanraya Malaysia dalam proses untuk melaksanakan persempadanan semula kawasan pilihanraya hendaklah memastikan wujud keseimbangan pemilih antara pilihanraya dan mengelak perbuatan menggerimander (gerrymandering) yang merugikan para pemilih."

**( Perdana Menteri )**

14. PR-1321-U59582

**Tuan Fong Kui Lun [ Bukit Bintang ]** akan mencadangkan:-

"Bahawa dewan ini menggesa Kerajaan hendaklah menyalurkan peruntukan tahunan bagi Ahli Parlimen secara adil, baik untuk wakil rakyat BN mahupun wakil rakyat pembangkang sebagaimana cadangan Kerajaan Negeri Pulau Pinang untuk menyalurkan peruntukan yang sama diterima oleh wakil-wakil rakyat pembangkang kepada wakil-wakil rakyat BN mulai tahun 2014."

**( Perdana Menteri )**

15. PR-1321-U60610

**Tuan Liew Chin Tong [ Kluang ]** akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi RM100 juta oleh Kementerian Pertahanan, mesti dibawa ke Parlimen untuk dibahas dan diaudit oleh Jabatan Audit Negara untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan."

**( Menteri Pertahanan )**

16. PR-1321-U60119

**Tuan Hee Loy Sian [ Petaling Jaya Selatan ]** akan mencadangkan:-

"Bahawa Dewan ini menolak politik samseng dan perkauman serta menggesa perdebatan dasar secara rasional dan tanpa keganasan. Tindakan keganasan beberapa NGO pro-Kerajaan terhadap warganegara biasa dan mengugut bunuh Ahli Dewan Undangan Negeri Macang Bubok Pulau Pinang dan Ahli Parlimen Seputeh telah melanggar undang-undang jenayah Malaysia, oleh yang demikian pihak polis mestilah menyiasat suspek di bawah Kanun Acara Jenayah dengan segera. Biarlah rakyat jelata mendengar penjelasan dalam satu perdebatan yang sihat dan dengan ini Malaysia akan mengorak langkah ke satu kebudayaan demokrasi yang lebih matang. Maka dengan ini Dewan hendaklah mengambil ketetapan untuk meminta Kerajaan melalui Peguam Negara untuk mengambil tindakan tegas terhadap pihak yang cuba meniupkan unsur perkauman dalam agenda politik mereka."

**( Perdana Menteri )**

17. PR-1321-U60120

**Tuan Hee Loy Sian [ Petaling Jaya Selatan ]** akan mencadangkan:-

"Bahawa Dewan ini mendesak Kerajaan menubuhkan mahkamah koroner yang tetap, bebas dan profesional bagi menjalankan inkues bagi semua kes kematian di bawah agensi-agensi penguatkuasaan undang-undang."

**( Perdana Menteri )**

18. PR-1321-U61176

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan mempertimbangkan cadangan untuk kes kematian dibawah tahanan Polis Diraja Malaysia, keluarga simati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga simati semasa bedah siasat dijalankan. "

**(Menteri Dalam Negeri )**

19. PR-1321-U61180

**Tuan Manivanan a/l Gowindasamy [ Kapar ]** akan mencadangkan:-

"Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia."

**( Menteri Pendidikan )**

**RISALAT-RISALAT YANG DIBAWA KE DALAM MESYUARAT  
(DEWAN RAKYAT)**

<b><u>TAHUN 2014</u></b>	<b><u>RISALAT/DOKUMEN</u></b>	<b><u>TARIKH DIBENTANGKAN</u></b>
ST. 19	Laporan Tahunan dan Penyata Kewangan Universiti Malaya (UM) Bagi Tahun 2012	20 Mac 2014
ST. 21	Laporan Tahunan dan Penyata Kewangan Universiti Malaysia Sabah (UMS) Bagi Tahun 2012	20 Mac 2014
ST. 22	Laporan Tahunan dan Penyata Kewangan Universiti Malaysia Kelantan (UMK) Bagi Tahun 2012	20 Mac 2014
ST. 28	AKTA FI 1951 Perintah FI (Perubatan) (Pesakit Bayar Penuh) (Pindaan) 2014	20 Mac 2014